



Los ntawm Thawj Tswj Hwm Thomas S. Monson

Nws Twb Sawv Lawm!

Qhov uas lub qhov ntxa tsis muaj leej tug nyob hauv lawm, teb tau Yauj lo lus nug, “Yog neeg tuag lawm, nws puas yuav rov muaj sia dua?”

Tuas no yeej yog ib tuas zoo kawg. Rau tag nrho cov uas tau hais lus los yog hu nkauj, vim kuv yog tus Thawj Tswj Hwm ntawm lub Koom Txoos, kuv tau txiav txim siab tias kuv yuav hais ob lo lus rau nej tam sim no, uas yog ob los lus Akiv tseem ceeb tshaj plaws. Rau Muam Cheryl Lant, nws ob tug pab cuam, pawg hu nkauj, pawg qoj nkauj, cov uas hais lus huv tib si, xav hais ob lo lus ntawd hais tias, “Ua tsaug.”

Ntau xyoo tas los, thaum kuv nyob lub zos London, teb chaws Askiv, kuv mus xyuas lub tsev txhab duab Tate uas muaj suab npe. Cov duab thiab khoom uas Gainborough, Rembrandt, Constable thiab lwm cov tau ua, nyob hauv ntau chav. Kuv saib lawv zoo nkauj heev thiab kuv paub tias cov uas ua lawv mas tshaj lig tiag tiag. Nyob xab peb hauv lub tsev, muaj ib daim duab

tom kaum tsev uas kuv saib ces nws raug kuv lub siab heev. Tus uas kos, hu ua Frank Bramley, tau kos ib lub tsev me me uas lub qhov rooj tig rau tus dej hiav txwv. Muaj ob tug poj niam, ib tug neeg nuv ntses niam thiab poj niam, nkawd saib thiab tos ib hmo rau nws rov qab los tsev. Nim no twb kaj ntug lawm, thiab nkawd paub tias nws tau poob zoo tom dej hiav txwv lawm thiab yeej yuav tsis rov qab los. Tus poj niam hluas txhos caug quaj ntawm niam pog ib sab, thiab niam pog muab tus poj niam hluas lub taub hau puag ntawm nws lub xub ntiag. Tus teeb qhais tau tag ua lub cim qhia tias nkawd tos ntev tsis muaj txiaj ntsiag dab tsi.

Kuv paub tias tus poj niam hluas mob siab; kuv pab nws tu siab. Cov lus uas tus kos muab sau hauv qab nws daim duab qhia txog zaj dab neeg tu siab no. Nws muab daim

duab hu ua: Ib Tag Kis uas tsis Muaj kev Cia Siab.

Tus poj niam hluas no xav kom muaj li cov lus uas ib tug hu ua Robert Louis tau sau, los nplij nws lub siab, hais tias:

Tus caij nkoj los tsev lawm, nws los tom dej hiav txwv los, Thiab tus uas mus plob, los pem roob los lawm.¹

Ntawm txhua yam peb paub txog lub neej no, tsis muaj dab tsi peb paub zoo tshaj tias ib hnub nws yuav xaus. Peb txhua tus yuav tas sim neej; tsis muaj ib tug yuav dim. Tej thaum kev tuag los ntxov, tej thaum lig; tej thaum nws los thaum yus nyuam qhuav tsa yus lub neej; los sis thaum tej plaub hau nyob saum yus . . . taub hau twb dawb paug tas; tej thaum nws los vim yus muaj mob . . . los sis . . . tej thaum vim yus laus xwb; tiam sis nws yeej yuav los.² Yus yeej tu siab thaum muaj ib tug uas yus hlub ncaim mus lawm thiab, thaum tus ntawd tseem hluas, yus khuv xim tias nws twb tsis tau ua ntau yam uas nws xav ua vim nws lub neej tau xaus ntxov.

Txhua tus tib neeg uas xiam ib tug uas nws hlub los sis, txhua tus uas twb yuav txog nws lub sij hawm mus, yeej xav txog tias muaj dab tsi nyob tom qab daim ntaub thaiv uas nyob hauv nruab nrab tej yam yus pom tau thiab tej yam yus pom tsis tau.

Ntau puas xyoo tas los, tus txiv neej hu ua Yauj—uas tau ntau xyoo yog ib tug neeg muaj muaj, tiam sis uas raug txhua yam phem uas ib tug tib neeg raug tau—tau zaum nrog ib

co phooj ywg thiab tau nug tias, “Yog neeg tuag lawm, nws puas yuav rov muaj sia dua?”³ Yauj nug yam uas txhua tus txiv neej thiab poj niam xav paub.

Tag kis sawv ntxov Easter no kuv xav tham txog Yauj lo lus nug no— “Yog neeg tuag, nws puas yuav rov muaj sia dua?”—thiab kuv xav teb tsis siv tej yam uas kuv xav tau lawm xwb tiam sis kuj siv Vajtswv cov lus uas Nws tau muab tshwm sim los. Kuv tham txog tej yam tseem ceeb tshaj ua ntej.

Yog muaj ib tug qauv hauv ntiaj teb no, yuav tsum muaj ib tug uas Tsim tus qauv ntawd. Puas muaj leej twg uas saib tau txhua yam txuj ci nyob saum ntuj thiab tsis ntseeg tias muaj ib tug uas tau tsim ib tug qauv rau tib neeg? Puas muaj leej twg uas ua tau xyem xyav tias puas muaj ib tug Tsim tiag?

Nyob hauv phau Chiv Keeb peb kawm tias tus Tsim Txhua Yam tau tsim lub ntuj thiab lub teb. “Lub ntiaj teb tsis tau muaj dabtsi thiab nyob do dus, tsaus ntuj nti thoob plaws saum nplaim dej hiav txwv.”

“Cia li muaj qhov pom kev,” tus Tsim Txhua Yam tau hais, “ces txawm pom kev kaj nrig tuaj.” Nws tsim lub zej zeeg ntuj. Nws muab cov av kem ntawm cov dej thiab hais tias, “Cia li tuaj me nroj me tsuag. . . . tsoob ntoo txi txiv raws li nws hom, thiab nws muaj noob.”

Nws tsim ob lub ci ci—lub hnuv thiab lub hli. Nws kuj tsim cov hnuv qub. Nws hais kom muaj tsiaj nyob hauv dej thiab noog ya nyob nruab ntug. Thiab txawm muaj li ntawd. Nws tsim tsiaj nyeg tsiaj qus, me nab

me qav, me kab me ntsaum. Ces txhua yam yuav luag tiav.

Thaum kawg, Nws tsim tib neeg kom muaj yam ntxwv ib yam li Nws—txiv neej thiab poj niam—thiab hais kom nkawd saib xyuas txhua yam uas ciaj.⁴

Tsuas yog tib neeg xwb thiaj txais kev txawj ntse—ib lub hlwb, kev xav, thiab ib tug ntsuj plig. Tib neeg xwb, vim muaj tej no, thiaj muaj tau kev ntseeg thiab kev cia siab, kev tshoov siab thiab kev ntshaw.

Puas muaj leej twg uas hais tau tias thaum tib neeg, uas yog yam zoo tshaj plaws uas Vajtswv tau tsim, uas saib xyuas txhua yam uas ciaj, uas muaj lub hlwb thiab kev xav, uas muaj ntsuj plig, uas muaj kev txawj ntse thiab kev dawb huv, yuav tsis muaj ntxiv thaum tus ntsuj plig ncaim ntawm lub cev?

Yuav kom peb to taub kev tuag, peb yuav tsum to taub lub hom phiaj ntawm lub neej no. Yus yuav tau muab yam uas yus xav tso tseg thiab ntseeg tej yam uas Vajtswv muab tshwm sim, vim los ntawm tej no peb paub tias peb ua neej ua ntej peb yug los. Hauv lub neej ua ntej, nyaj peb yog ib co ntawm Vajtswv cov tub thiab ntxhais uas tau qw zoo siab vim peb muaj cib fim los hauv lub neej nyuaj no.⁵ Peb paub hais tias peb lub hom phiaj yog txais ib lub cev nqaij, kov yeej lawv tej teeb meem, thiab ua kom Vajtswv pom tias lawv kam koj raws li Nws tej lus txib. Vim lub neej hauv ntiaj teb no nyuaj, peb Leej Txiv paub tias peb yuav raug ntxias ua kev phem thiab peb yuav ua tsis zoo tag nrho. Xwv kom peb yuav kov yeej tau, Nws tau

muab ib tug Cawm Seej rau peb los tuag theej peb txhoj. Nws yuav tsis theej peb txhoj xwb, tiam sis Nws kuj yuav kov yeej kev tuag ntawm sab nqaij daim tawv uas peb txhua tus yuav raug vim Adas txoj kev poob.

Ces, tshaj ob txhiab xyoo tas los, Yexus, peb tug Cawm Seej tau yug los rau hauv ib lub tsev rau tsiaj nyob lub zos Npelehees. Tus Mexiyas tau los, tus uas tau qhia txog thaum ub.

Tsis muaj lus ntau uas qhia txog Yexus thaum nws yog ib tug tub hluas. Kuv nyiam zaj uas Lukas sau: “Yexus loj hlob zoo, muaj tswv yim, nws ua haum Vajtswv siab thiab haum neeg siab.”⁶ Nyob hauv phau Cov Tub Txib Txoj Hauj Lwm, muaj ib zaj tsis ntev txog tus Cawm Seej uas qhia ntau yam: “Nws mus ncig teb ncig chaw, nws ua zoo rau sawv daws.”⁷

Yauhas muab Nws ua kev cai raus dej hauv tus dej Yauladees. Nws hu Kaum Ob tug Thwj Tim. Nws foom koob hmoov rau cov uas muaj mob. Nws pab neeg ceg tawv mus kev, neeg dig muag pom kev, thiab neeg lag ntseg hnov lus. Nws tsa cov neeg tuag. Nws qhia, Nws ua tim khawv, thiab Nws ua ib tug yam ntxwv zoo rau peb xyaum.

Ces tus Cawm Seej txoj hauj lwm hauv ntiaj teb twb yuav xaas. Nws noj mov zaum kawg nrog nws cov Thwj Tim hauv ib lub hoob txheej saud. Txuas ntxiv nws tseem yuav mus Khexemanes thiab Khauj Khaum Taub Hau.

Tib neeg tsis muaj peev xwm to taub txhij tias tej yam Yexus ua rau peb nyob Khexemanes tseem ceeb npaum li cas. Nws tau piav txog lub

sij hawm ntawd tias, kev raug mob ua rau nws, tus uas yog Vajtswv, uas muaj hwj chim loj tshaj plaws, lub cev tshee hnyo vim nws hnov mob heev, thiab tawm ntshav ntawm txhua qhov hws, thiab muaj mob ntawm sab nqaj tawv thiab sab ntsuj plig huv tib si.⁸

Tom qab nws raug mob hauv Khexemanes, thaum nws tsis muaj zog lawm, cov tib neeg uas nyaum heev muab nws koj mus sawv ntawm Anas, Khaiyafas, Philaj thiab Helauj tej xub ntiag. Luag liam thiab hais lus phem txog Nws. Lawv muab nws nplawm ua rau Nws lub cev uas twb mob mob kom sab tshaj plaws. Ntshav ntw los rau nws lub ntsej muag thaum lawv muab hmab pos ua kauj los looj nws lub taub hau. Ces, ib zaug ntxiv, lawv koj Nws mus rau Philaj, uas tau ua raws li cov neeg coob uas chim tau qw: “Muab nws tua, muab nws tua.”⁹

Lawv muab nws nplawm siv ib txoj tawv nyuj uas lawv muab hlau thiab pob txha khi rau. Nws sawv ntawm qhov ntawd taug kev mus yam qaug zog tshaj plaws, ev nws tus ntoo khaub lig txog thaum Nws mus tsis taus ntxiv ces lwm tus ev rau Nws.

Thaum kawg, nyob saum lub roob khauj khaum taub hau, nws cov pab koj saib ua tsis tau dab tsi, lawv muab nws lub cev uas sab ntsia saum tus ntoo khaub lig. Tib neeg thuam, hais lus phem, thiab tsis lees Nws. Tiam sis Nws tseem hais tias, “Txiv, thov koj zam txim rau lawv! Vim lawv tsis paub hais tias lawv ua dabtsi.”¹⁰

Ib xuab moo dhau ib xuab txav ze zog rau lub sij hawm nws yuav mus. Nws lub qhov ncauj thiab di ncauj

uas qhuav hais tias, “Txiv, kuv muab kuv txoj sia tso rau hauv koj txhais tes!” Yexus hais li ntawd tas, nws txawm tuag lawm.”¹¹

Thaum Nws tuag, Nws dim Nws txoj kev nyuaj siab hauv lub neej no, thiab rov qab mus nyob hauv Nws Leej Txiv lub xub ntiag.

Thaum Nws lub neej yuav luag xaus, tus Xib Hwb yeej tseem thim tau. Tiam sis Nws tsis thim. Nws txo hwj chim thiab raug txhua yam, kom nws cawm tau txhua yam. Tib neeg ua tib zoo muab nws lub cev tso rau hauv ib lub qhov ntxa uas lawv qiv ntawm lwm tug.

Tsis muaj lwm cov lus uas raug kuv siab tshaj cov uas tus tim tswv tau hais rau Maivliag Madalas thiab lwm tus Maivliag uas quaj thaum, thawj hnuv lub as thiv ntawd, uas nkawd los xyuas lub qhov ntxa los tu nkawd tus Tswv lub cev. Tus tim tswv hais tias:

“Ua li cas nej tuaj nrhiav neeg ciaj hauv lub qhov tuag no?”

Nws tsis nyob ntawm no, Nws twb sawv los lawm.”¹²

Peb tus Cawm Seej tau rov qab ciaj. Nws tau kov yeej kev tuag, uas yog yam hauv noob neej zaj keeb puam uas nplij tau peb lub siab tshaj lwm yam. Kev mob thiab txom nyem uas Nws raug hauv Khexemaes thiab Khauj Khaum Taub Hau tsis muaj ntxiv. Nws ua tiav qhov uas yuav cawm neeg dim. Nws ua kom Adas txoj kev poob tsis ua li cas.

Qhov uas lub qhov ntxa tsis muaj leej twg nyob hauv lawm, teb tau Yauj lo lus nug, “Yog neeg tuag lawm, nws puas yuav rov muaj sia dua?” Kuv tshaj tawm rau txhua tus uas hnov

tau kuv lub suab, yog neeg tuag, nws yeej yuav rov muaj sia dua. Peb paub, vim Vajtswv twb muab qhov tseeb qhia rau peb.

“Tim ib tug neeg, mas txoj kev tuag thiaj li txeem los. Tab sis ib tug neeg rov koj tau txoj kev sawv rov los rau cov tuag.

Sawv daws tuag nyob hauv As Das. Tab sis sawv daws yuav ciaj rov los nyob hauv Khetos.”¹³

Kuv tau nyeem—thiab kuv ntseeg—cov lus tim khawv ntawm cov neeg uas tau muaj kev nyuaj siab thaum lawv pom Khetos tuag thiab uas muaj kev xyiv fab thaum nws sawv rov qab los. Kuv tau nyeem—thiab kuv ntseeg—cov lus tim khawv ntawm cov neeg uas nyob teb chaws Amelikas uas tus Tswv tau los xyuas.

Kuv ntseeg cov lus tim khawv ntawm ib tug uas, thaum lub caij nyooog no, tau tham nrog Leej Txiv thiab Leej Tub hauv koog ntoo uas peb hu hais tias Dawb Huv, uas tau tuag ua ib qho puav pheej tias nws cov lus muaj tseeb. Nws hais tias,

Tom qab ntau tus twb ua pov thawj txog nws lawm, nov yog nws cov lus pov thawj kawg uas nws hais, tias tus Tswv muaj sia nyob!

Vim nws pom tus Tswv, nyob ntawm Vajtswv sab tes xis, thiab tau hnov ib lub suab qhia tias nws yog Leej Txiv Tib Leeg Tub.¹⁴

Kev tuag txoj kev tsaus ntuj nti ploj mus los ntawm qhov tseeb txoj kev kaj nrig. Tus Xib Hwb tau hais tias, “Kuv yog txoj kev sawv hauv qhov tuag rov qab los thiab yog txoj sia.”¹⁵ “Kuv muab kuv txoj kev kaj siab tso rau nej.”¹⁶

Tau ntau xyoo no kuv twb hnov

thiab nyeem ntau zaj lus pov thawj uas suav tsis txheeb, uas luag hais rau kuv ua lus pov thawj tias muaj txoj kev sawv hauv qhov tuag rov qab los tiag. Thaum lawv nyuaj siab tshaj, lawv txais tau kev thaj yeeb thiab kev nplij siab ib yam li tus Cawm Seej tau cog lus.

Kuv xav nyeem ib tug cov lus pov thawj. Ob lub lim tiam tas los kuv tau txais ib tsab ntawv los ntawm ib tug txiv uas muaj xya tus menyuam uas tau sau txog nws tsev neeg, thiab txog nws tus tub Jason, uas kis tau mob thaum nws muaj 11 xyoo. Tau ntau xyoo tom qab nws kis tau lawm, tus mob, tej thaum muaj thiab tsis muaj. Tus txiv sau txog txoj kev Jason zoo siab, txawm yog nws muaj mob. Jason tau txais lub Pov Thawj Hwj Aloos thaum nws muaj 12 xyoo thiab “nws yeej kam ua nws lub luag hauj lwm kom zoo kom tas, txawm tias nws nyob zoo los sis nyob tsis zoo.” Nws txais nws lub puav pheej Eagle Scout thaum nws muaj 14 xyoo.

Lub caij sov tas los, tsis ntev tom qab nws muaj 15 xyoo, nws rov qab mus nyob tom tsev kho mob. Ib zaug thaum nws txiv mus xyuas nws, Jason pw tsis qheb qhov muag. Vim nws tsis paub xyov Jason puas tsaug zog los tsis tsaug, nws hais lus ntxhi rau nws. Nws hais tias, “Jason, kuv paub koj ntsib teeb meem ntau hauv koj lub neej lawm thiab tias lub caij no nyuaj rau koj. Txawm yog yav tom ntej tseem yuav muaj tej yam nyuaj tshaj, koj tsis txhob poob koj txoj kev ntseeg Yexus nawb.” Nws txiv ceeb mentsis thaum Jason txawm cia li qheb qhov muag thiab ua lub suab hais meej meej tias “Kuv

yeej yuav tsis poob!” Ces Jason rov qab qis qhov muag tsis hais ntxiv.

Nws txiv sau tias, “Thaum nws hais cov lus no, Jason tau ua pov thawj txog Yexus Khetos ib yam uas muaj zog tshaj plaws tej kuv tau hnov dua. . . . Cov lus uas nws hais hnuv ntawd Yeej Yuav Tsis Poob! yuav nyob nraim hauv kuv lub siab mus ib txhis, kuv lub siab tau muaj kev xyiv fab puv npo rau kuv Leej Txiv Saum Ntuj uas nws tau muab ib tug tub zoo thiab uas muaj hwj chim los rau kuv . . . [ntawd] yog zaum kawg uas kuv hnov nws ua pov thawj txog Khetos.”

Txawm yog nws tsev neeg tsuas xav tias nws yuav rov qab mus nyob tsev kho mob tsis ntev xwb, Jason tau tas sim neej ob lub lim tiam tom qab ntawd. Nws tus tij laug thiab ib tug muam hlob tau ua tub thiab ntxhais txib tam sim ntawd. Ib tug tij laug, Kyle, nyuam qhuav txais tau nws tsab ntawv hu mus ua tub txib. Nws txais tsab ntawv ntawd ntxov tshaj qhov uas nws xav ces thaum lub yim hli vas thib 5, ib as thiv ua ntej Jason tas sim neej, lawv tsev neeg tau los nyob ua ke tom lub chav kho mob los saib thaum Kyle nyeem nws tsab ntawv.

Hauv tsab ntawv uas nws xa rau kuv, tus txiv tsev tso ib daim duab uas muaj Jason nyob hauv nws txaj pw tom tsev kho mob nrog nws tij laug Kyle uas sawv ntawm nws txaj pw ib sab. Kyle tab tom tuav nws tsab ntawv. Hauv qab daim duab nws hais tias: “Ob tug puav leej raug txib mus ua tub txib—ib tug rau ib sab ib tug rau lwm sab ntawm daim ntaub thaviv.”

Jason tus tij laug thiab tus muam

uas tab tom ua tub thiab ntxhais txib xa ob tsab ntawv rau lwm tus nyeem tom nws lub ntees tuag. Nws tus muam, uas ua ntxhais txib nyob Argentina, Buenos Aires West, sau hauv nws tsab ntawv tias: “Kuv paub tias Yexus Khetos tseem muaj txoj sia nyob, thiab vim nws tau sawv, Jason thiab peb sawvdaws kuj yuav sawv thiab . . . peb muaj kev thaj yeeb vim peb paub tias peb tau sib khi kom yuav nyob ua ke mus ib txhis. . . . Yog peb ua tib zoo mloog lus thiab koj zoo hauv lub neej no, ib hnuv peb yuav pom [nws dua].” Nws hais ntxiv, “[Ib] nqes vaj lug kub uas kuv ib txwm nyiam raug kuv lub siab tshaj plaws tam sim no . . . nws [nyob hauv] phau Tshwm Sim tshooj 21 nqes 4; ‘Nws yuav so lawv tej kua muag huv tibsi mus. Tej kev tuag, kev ntxhov siab, kev quaj ntsuag thiab kev mob kev nkeeg yuav tsis muaj ib zaug li lawm. Tej uas sawvdaws ib txwm muaj los twb ploj tas lawm.”

Cov kwv tij thiab muam uas kuv hlub, thaum peb nyuaj siab tshaj, peb muaj tau kev thaj yeeb los ntawm cov lus uas tus tim tswv hais hnuv Easter sawv ntxov ntawd, “Nws tsis nyob ntawm no: vim nws twb sawv lawm.”¹⁷

Nws twb sawv lawm! Nws twb sawv lawm!

Qhia nrov nrov rau neeg sawv daws.

Nws tau tawm hauv qhov ntxa rov los;

Sawv daws cia li zoo siab blo.

Kev tuag tau swb, neeg tau dim.

*Yexus tau yeej mus ib txhis.*¹⁸

Vim kuv yog Nws ib tug tim khawj tshwj xeeb hauv ntiaj teb tam sim no, hnuv caiv Easter zoo heev no, kuv tshaj tawm hais tias qhov no muaj tseeb, los ntawm Nws lub npe dawb huv—uas yog Yexus Khetos, peb tus Cawm Seej—amees.

NOTES

1. Robert Louis Stevenson, “Requiem,” hauv *An Anthology of Modern Verse*, ed. A. Methuen (1921), 208.
2. James E. Talmage, *Jesus the Christ*, 3rd ed. (1916), 20.
3. Yauj 14:14.
4. Saib Chivkeeb 1:1–27.
5. Saib Yauj 38:7.
6. Lukas 2:52.
7. Cov Tub Txib 10:38.
8. Saib Doctrine and Covenants 19:18.
9. Lukas 23:21.
10. Lukas 23:34.
11. Lukas 23:46.
12. Lukas 24:5–6.
13. 1 Kaulinthaas 15:21–22.
14. Saib Doctrine and Covenants 76:22–23.
15. Yauhas 11:25.
16. Yauhas 14:27.
17. Mathais 28:6.
18. “He Is Risen!” *Hymns*, naj npawb 199.

Kev Qhia rau Peb lub Caij Nyoog

Pov Thawj Hwj Mekixedes thiab Koom Haum Niam Tsev tej kev sib ntsib rau Hnuv Sunday thib plaub ntawm txhua lub hlis yuav rau siab kawm “Kev Qhia rau Peb lub Caij Nyoog.” Yūs siv tau ib los yog ob peb zaj lus uas lawv hais hauv lub tuam rooj sab laj tsis ntev tas los no kom npaj txhua zaj lus qhia. Ceg txheem ntseeg thiab koog chaw cov thawj tswj hwm xaiv tau tej zaj lus uas yuav siv, los sis lawv muab kev lav ris no rau cov npi sov thiab ceg txheem ntseeg cov thawj tswj hwm. Cov thawj coj yuav tsum ua tib zoo qhia tias qhov uas cov kwv tij uas tuav lub Pov Thawj Hwj Mekixedes thiab cov viv ncaus hauv Koom Haum Niam Tsev kawm tej zaj lus zoo ib yam thaum tib hnuv Sunday muaj nqi heev.

Peb caw kom cov uas tuaj koom Hnuv Sunday thib plaub tej zaj lus kawm kawm thiab nqa phau xov xwm hais txog lub tuam rooj sab laj uas nyuam qhuav tuaj tuaj.

Tej Tswv Yim rau Kev Npaj ib zaj Lus Qhia los ntawm tej zaj Lus Hais

Thov Vajtswv kom tus Vaj Ntsuj Plig Dawb Huv yuav nrog koj nyob thaum koj kawm thiab qhia txog (tej) zaj lus hais. Tej zaum koj yuav raug ntxias

kom koj siv lwm yam pab koj npaj koj zaj lus qhia, tiam sis tej zaj lus los ntawm lub rooj sab laj yog tej uas peb tau tso cai siv. Koj tej hauv lwm yog txoj kev pab lwm tus kawm thiab ua neej raws li txoj moo zoo, zoo li tau qhia hauv lub Koom Txoos lub tuam rooj sab laj tsis ntev tas los no.

Rov xyuas (tej) zaj lus hais, nrhiav tej ntsiab cai thiab cov lus qhuab qhia uas yuav pab cov neeg hauv chav kawm. Nrhiav tej zaj dab neeg, nqe vaj lug kub, thiab tej lus uas tau los ntawm (tej) zaj lus hais uas yuav pab koj qhia tej yam tseeb no.

Cia li sau cov ntsiab tseem ceeb tseg txog txoj kev qhia tej ntsiab cai thiab cov lus qhuab qhia. Koj daim ntawv no yuav tau muaj cov lus nug uas yuav pab cov neeg hauv chav kawm:

- Nrhiav tej ntsiab cai thiab lus qhuab qhia hauv (tej) zaj lus hais ntawd.
- Cia li kawm txog lub ntsiab.
- Qhia tej uas lawv to taub, tej tswv yim, tej yam uas muaj thaum yav tas los, thiab zaj lus tim khawv.
- Nruab tej ntsiab cai thiab tej lus qhuab qhia no rau lawv lub neej.

TEJ LUB HLI NTUJ	HNUV SUNDAY THIB PLAUB COV NTAWV RAU ZAJ LUS KAWM
Tsib Hlis Ntuj 2010–Kaum Hli Ntuj 2010	Tej zaj lus hais uas tau luam tawm nyob rau hauv lub Tsib Hlis Ntuj 2010 <i>Liahona</i> *
Kaum Ib Hlis Ntuj 2010–Plaub Hlis Ntuj 2011	Tej zaj lus hais uas tau luam tawm nyob rau hauv lub Kaum Ib Hlis Ntuj 2010 <i>Liahona</i> *

© 2010 by Intellectual Reserve, Inc. All rights reserved. Printed in USA. English approval: 6/09. Translation approval: 6/09. Translation of *First Presidency Message, May 2010*. Hmong. 09365 295

*Tej zaj lus no (txbais rau ntau yam lus) los muaj nyob ntawm conference.lds.org.



Los ntawm Thawj Tswj Hwm Henry B. Eyring

Tus Pab Cuam thib Ib hauv Thawj Pawg Thawj Tswj Hwm

Pab Lawv Rov Qab Mus txog Tsev

Peb pab Vajtswv cov me nyuam zoo tshaj plaws thaum peb npaj kev rau lawv muaj siab ntseeg rau ntawm Yexus Khetos thiab Nws txoj moo zoo uas txum tim rov qab los, thiab ua li no thaum lawv tseem yau.

Cov kwv tij thiab cov muam, peb Leej Txiv Saum Ntuj Ceeb Tsheej xav tau peb tej kev pab thiab xav kom peb pab coj Nws cov me nyuam ntsuj plig rov qab los nrog Nws nyob dua ib zaug ntxiv. Kuv hais lus hnuv no hais txog cov tub hluas ntxhais hluas uas twb koom Vajtswv lub Koom Txoos uas muaj tseeb thiab twb pib taug txoj kev ncaj thiab nqaim kom rov qab mus rau lawv lub tsev Saum Ntuj Ceeb Tsheej. Vajtswv xav kom lawv muaj dag zog rau ntawm sab ntsuj plig thaum ntxov kom thiaj taug tau txoj kev mus no es mus kom tom thawj. Thiab Vajtswv xav tau peb tej kev pab kom coj lawv rov qab los taug txoj kev zoo yog tias lawv pib ua loj leeb.

Kuv yog ib tug npis sov thaum kuv pib pom meej meej yog vim li cas tus Tswv xav kom peb ntxiv dag zog rau cov me nyuam thaum lawv tseem hluas thiab npo lawv tawm ntawm kev phem kev qias yam sai sai li. Kuv yuav qhia nej txog ib tug poj niam hluas uas piv tau rau neeg coob heev uas kuv tau sim pab tau ntau xyoo los lawm no.

Nws zaum ntawm kuv lub rooj ntawv npis sov sab tod. Nws hais lus rau kuv txog nws lub neej. Nws tau ua kev cai raus dej thiab txais kev pom zoo ua lub Koom Txoos ib tug mej zeej thaum nws muaj hnuv nyoog yim zoo. Nws twb tsis quaj thaum nws qhia txog lub sij hawm nees nkaum xyoo uas muaj los tom qab nws ua kev cai raus dej ntawd,

tiam sis nws lub suab yeej hais li nws tu siab heev. Nws hais tias nws pib poob ua txhaum thaum nws xaiv los koom cov neeg uas nws xav tias yog ib co neeg lom zeem heev. Ces nws pib ua txhaum tej kev txib uas nws saib tsis tshua tseem ceeb pes tsawg.

Thaum xub thawj nws ib nyuag tu siab thiab ib nyuag saib nws tus kheej muaj txim. Tiam sis qhov uas nws nrog nws cov phooj ywg tshiab ua ntau yam ua ke tau ua rau nws xav tias lawv nyiam nws heev ces tej lub sij hawm uas nws xav tias nws yuav hloov siab lees txim txawm tsawg zuj zus tuaj mus. Ces nws yim ua txhaum tej kev txib loj zuj zus, nws yim xav hais tias nws yeej yuav ncav tsis tau zaj npau suav kom muaj ib tse neeg uas muaj kev zoo siab thiab nyob ua ke mus ib txhis li.

Nws txawm qhia kuv hais tias nws txom nyem siab heev. Nws xav kom kuv npo nws tawm ntawm txoj kev txhaum rooj ntxiab uas mag tau nws. Tiam sis tsuas muaj ib qho kev dim xwb uas yog nws yuav tsum muaj siab ntseeg rau ntawm Yexus Khetos, muaj ib lub siab tawg rhe, hloov siab lees txim, thiab los ntawm tej ntawd, raug ntxuav kom dawb huv, hloov siab tiag, thiab txais dag zog ntxiv dhau ntawm tus Tswv txoj Kev Theej Txhoj. Kuv ua tim khawv rau nws hais tias nws yeej ua tau tej no. Thiab nws ua tau, tiam sis ua li ntawd yeej nyuaj dua qhov uas nws yuav muaj siab ntseeg thaum ntxov thiab thaum nws nyuam qhuav pib ua loj leeb taug tej kev tsis yog.

Yog li ntawd, peb pab Vajtswv cov me nyuam zoo tshaj plaws thaum

peb npaj kev rau lawv muaj siab ntseeg rau ntawm Yexus Khetos thiab Nws txoj moo zoo uas txum tim rov qab los, thiab ua li no thaum lawv tseem yau. Thiab peb yuav tsum pab rov qab rauv taws rau txoj kev muaj siab ntseeg ntawd thaum twg lawv ua loj leeb tsis taug txoj kev yog lawm.

Yog li ntawd, nej thiab kuv yuav muaj cib fim ntau nplua mias pab Vajtswv cov me nyuam hauv lub neej no. Tus Cawm Seej qhia peb yog vim li cas yuav muaj li ntawd thaum Nws piav txog txoj kev rov qab mus tsev uas tag nrho Vajtswv cov me nyuam ntsuj plig yuav tsum taug thaum muaj tej huab iab oo uas txoj kev txhaum thiab Ntxwg Nyoog tsim tau kom ua rau qhov muag plooj, hais tias:

“Nej yuav tsum mus lub qhov rooj nqaim; rau qhov lub qhov rooj loj thiab txoj kev dav coj mus rau ntuj tawg thiab muaj coob leej taug txoj kev ntawd;

“Tiam sis lub qhov rooj nqaim thiab txoj kev me uas mus nyuaj yuav coj mus tau txoj sia, cov neeg uas taug txoj kev ntawd tsis muaj coob leej.”¹

Vim rau qhov uas Nws pom tau saib Nws cov me nyuam xav tau kev pab li cas, Leej Txiv Saum Ntuj Ceeb Tsheej tau npaj paib qhia kev thiab ib co neeg cawm dim uas nyob ntawm kev yuav pab lawv. Nws xa Nws Leej Tub, Yexus Khetos, kom thiaj npaj tau kev mus dawb mus huv rau peb. Nws hu Nws tus yaj saub rau lub caij nyooog no, Thawj Tswj Hwm Thomas S. Monson. Txij thaum nws tseem hluas los, Thawj Tswj Hwm Monson tau

qhia saib yuav tsum ua li cas taug txoj kev nraim thiab nws pab lawv cov uas tau raug txom nyem los yog kev tu siab.

Leej Txiv Saum Ntuj Ceeb Tsheej tau hais kom peb ua hauj lwm rau ntawm tej qhov chaw so ntawm kev kom thiaj ntiv dag zog rau thiab, thaum twg toob kas, coj cov neeg taug kev mus rau kev nyab xeeb. Peb txoj hauj lwm tseem ceeb thiab muaj hwj chim tshaj yog nyob hauv peb tsev neeg. Tej hauj lwm no tseem ceeb vim tsev neeg thiaj muaj lub cib fim thaum ib tug me nyuam twg lub neej nyuam qhuav pib kom pab tus me nyuam pib taug txoj kev rov qab mus tsev saum ntuj ceeb tsheej. Ib tsoom niam txiv, kwv tij nus muag, pog thiab yawg, niam tais yawm txiv, thiab ntiv haj yam muaj hwj chim ua ib tug coj kev thiab ib tug cawm dim vim yog txoj kev hluv uas nyob hauv ib tsev neeg.

Tsev neeg muaj yeej tau thaum thawj yim xyoo ntawm ib tug me nyuam twg lub neej. Thaum lub sij hawm ntawd, vim yog Yexus Khetos txoj Kev Theej Txhoj, Ntxwg Nyoog tsis muaj cai tso tej huab tsaus ntuj nti kom npog txoj kev rov qab mus tsev saum ntuj ceeb tsheej. Thaum lub sij hawm ntawd, tus Tswv pab tsev neeg thaum Nws hu cov neeg ua hauj lwm hauv lub Koom Haum Me Nyuam kom pab ntiv dag zog rau cov me nyuam sab ntsuj plig. Nws kuj npaj cov tub hluas uas tuav lub Pov Thawj Hwj Aloos kom muab lub cim nco txog yais rau sawv daws. Hauv tej zaj lus thov Vajtswv foom koob hmoov rau lub cim nco txog,

cov me nyuam hnov lo lus cog tseg hais tias lawv yuav txais tau Vajtswv tus Ntsuj Plig yog tias lawv ua raws li Vajtswv tej kev txib. Vim yog li ntawd, lawv thiaj muaj dag zog txaus tiv tau tej kev haub kev ntivias thaum muaj los thiab lwm hnuv mus pab cawm lwm tus neeg dim thiab.

Lub Koom Txoos cov npis sov coob leej raug tshoov siab kom hu cov neeg uas muaj zog ntau tshaj plaws ntawm sab ntsuj plig kom ua hauj lwm pab cov me nyuam hauv lub Koom Haum Me Nyuam Yaus. Cov npis sov no paub hais tias yog tias cov me nyuam tau dag zog los ntawm qhov uas lawv pom lwm tus neeg txoj kev ntseeg thiab hnov lawv cov lus tim khawv, ces thaum cov me nyuam loj hlob tiav nkauj tiav nraug, lawv yuav tsis toob kas kev pab cawm dim ntau. Cov npis sov no paub hais tias ib lub hauv paus rau ntawm sab ntsuj plig yuav pab lawv hauv lawv lub neej mus li.

Peb puav leej pab tau. Cov niam tais yawm txiv, cov pog yawg, thiab txhua tus mej zeej uas paub ib tug me nyuam pab tau. Peb tsis tas muaj hauj lwm ua hauv lub Koom Haum Me Nyuam Yaus. Tsis yog ib yam uas neeg laus ua tsis tau thiab. Muaj ib tug poj niam, thaum nws tseem hluas, tau koom lub tuam rooj rau lub Koom Haum Me Nyuam kom pab tsim cov lus txhib hais tias XQY.

Nws yeej tsis nkees nkees hais txog ntawm txoj kev pab cov me nyuam yaus. Nws qhia hauv nws pawg ntseeg lub Koom Haum Me Nyuam Yaus mus txog thaum nws yuav luag nto hnuv nyooog 90 xyoo.

Cov me nyuam yaus paub hais tias tus poj niam ntawd hlub lawv. Lawv pom nws tus yam ntxwv. Nws pab lawv kawm txog tej ntsiab cai yooj yim ntawm Yexus Khetos txoj moo zoo. Thiab hais dav dav, vim yog nws tus yam ntxwv, cov me nyuam kawm paub txog thiab hnov tau tus Vaj Ntsuj Plig Dawb Huv. Thiab thaum lawv ua li ntawd, lawv tab tom muaj siab ntseeg txaus yuav tiv tau tej kev haub kev ntxias uas yuav muaj los. Lawv yuav tsis tas muaj lwm tus neeg cawm lawv dim thiab lawv yuav npaj tau lawm mus cawm lws tus neeg uas toob kas dim.

Thaum kuv poj niam wb cov me nyuam tseem me, kuv tau kawm saib txoj kev ntseeg rau ntawm kev thov Vajtswv thiab tus Vaj Ntsuj Plig Dawb Huv muaj hwj chim npaum li cas. Peb tus tub hlob tseem tsis tau ua kev cai raus dej. Kuv thiab kuv poj niam, nws cov kws qhia hauv lub Koom Haum Me Nyuam Yaus, thiab cov txiv neej tuav lub pov thawj hwj tau sim pab nws hnov thiab paub txog tus Ntsuj Plig thiab paub saib yuav tsum ua li cas kom thiaj tau Nws kev pab.

Muaj ib tav su, kuv poj niam tau coj wb tus tub ntawd mus tom tus poj niam uas qhia nws nyeem ntawv lub tsev. Kuv poj niam wb lub tswv yim yog hais tias kuv yuav mus tos wb tus tub thaum kuv los tom hauj lwm los mus tsev.

Wb tug tub ntawd xaus nws kev kawm nyeem ntawv ntxov dua peb tau xav. Nws xav hais tias nws pom qab taug kev los mus tsev. Ces, nws pib taug kev los mus. Tom qab no,

nws hais tias nws xav tias nws ua tau thiab nws nyiam qhov uas nws nyob nws ib leeg xwb. Tom qab uas nws tau taug kev los li ib mais tawm, tab tom tsaus ntuj zuj zus tuaj. Nws txawm xav zoj hais tias nws tseem nyob deb heev ntawm nws lub tsev.

Nws tseem nco tau hais tias nws pom cov tshab cov teeb yam plooj plooj li vim nws los kua muag ntau. Nws tab tom xav tias nws yog me nyuam yaus xwb, tsis yog tus me nyuam tub uas muaj siab loj thaum nws pib taug kev los mus tsev. Nws pom tau tias nws xav tau kev pab. Nws txawm nco tau ib yam tseem ceeb. Nws paub hais tias nws yuav tsum thov Vajtswv. Ces nws tawm ntawm txoj kev mus rau hauv ib koog ntoo uas nws pom tau me ntsis xwb. Nws nrhiav tau ib qho chaw txhos caug.

Tsis ntev hauv tej tsob ntoo, nws hnov tau leej twg lub suab los rau ntawm nws. Muaj ob tug tub hluas hnov nws quaj. Thaum nkawd los ze, nkawd hais tias, “Wb pab koj puas tau?” Nws ke so kua muag ke qhia nkawd hais tias nws poob zoo thiab hais tias nws xav rov qab mus tsev. Nkawd noog saib nws puas paub nws tus xov tooj hauv tsev los yog nws qhov chaw nyob. Nws teb tias nws tsis paub. Nkawd noog saib nws puas paub nws lub npe hu li cas. Nkawd coj nws mus rau nkawd lub tsev. Nkawd nrhiav tau peb tsev neeg lub xeeb hauv ib phau xov tooj.

Thaum kuv teb xov tooj, kuv txawm khiav mus pab kuv tus tub, thiab kuv ua Vajtswv tsaug rau cov neeg siab zoo uas tau pab coj nws

rov qab los tsev. Tsis tas li ntawd xwb, kuv ua Vajtswv tsaug uas peb tau qhia kom nws muaj siab ntseeg thov Vajtswv kom tau kev pab thaum nws poob zoo. Txoj kev ntseeg ntawd tau coj nws los rau kev nyab xeeb thiab tau coj cov neeg pab los pab cawm nws dim ntau zaus los lawm.

Hauv nws lub nceeg vaj, tus Tswv tau npaj kom muaj ib co neeg uas pab cawm cov neeg uas poob zoo dim. Raws li Nws lub tswv yim zoo, tus Tswv tau tshoov Nws cov tub qhe lub siab kom npaj ob peb yam uas muaj hwj chim ntau ntxiv dag zog rau peb, thiab nws tau npaj cov neeg uas txawj cawm dim zoo tshaj, rau lub sij hawm uas peb tseem ua tub hluas ntxhais hluas.

Tej zaum nyaj nej paub txog ob lub hom phiaj uas muaj hwj chim thiab uas yog tus Tswv npaj tseg. Ib qho, rau cov Ntxhais Hluas yog hu ua, “Personal Progress.” Qhov thib ob, rau cov tub hluas tuav lub Pov Thawj Hwj Aloos, yog hu ua, “Duty to God.” Peb yaum kom cov tub hluas ntxhais hluas uas koom tiam neeg uas tab tom loj hlob tiav nkauj tiav nraug pom tau tias ob lub hom phiaj no pab tau lawv muaj zog rau ntawm sab ntsuj plig heev. Thiab peb taj thov lawv cov uas muaj siab hlub tshua cov tub hluas ntxhais hluas no kom ua raws li qhov uas tus Tswv lub siab xav kom peb thiaj pab tau lawv. Thiab vim lawv yog cov uas yuav coj lub Koom Txoos nyob rau lub sij hawm tom ntej, peb puav leej hlub cov tub hluas ntxhais hluas.

Ob lub hom phiaj no tau hloov kom zoo zuj zus tuaj tiam sis lub

ntsiab tseem zoo li qub. Thawj Tswj Hwm Monson hais li no hais tias: peb yuav tsum “kawm qhov uas peb yuav tsum kawm, ua qhov uas peb yuav tsum ua, thiab ua tus neeg uas peb yuav tsum ua thiab.”²

Phau ntawv Personal Progress rau cov ntxhais hluas qhia lub ntsiab no yam meej meej li rau lawv: “Lub hom phiaj Personal Progress siv pawg Ntxhais Hluas yim qhov uas saib rau nqi kom pab koj to taub zoo dua saib nej yog leej twg, yog vim li cas nej nyob hauv lub ntiaj teb no, thiab saib nej yuav tsum ua li cas ua Vajtsww ib tug ntxhais kom thiaj npaj mus tom lub tuam tsev thiab nrog tus Tswv sib khi lus dawb ceev.”

Phau ntawv no hais txuas ntxiv hais tias cov ntxhais hluas yuav “cog lus tseg tias lawv yuav ua ib yam dab tsi, ua yam ntawd, thiab qhia saib lawv tau ua li cas rau ib tug niam txiv los yog ib tug thawj coj.” Phau ntawv no kuj cog lus tias, “Tej yam uas koj xyaum ua thaum koj ua hauj lwm rau Personal Progress—xwm li kev thov Vajtsww, kev pab lwm tus neeg, thiab kev sau ntawv rau hauv phau ntawv ceev xwm txheej—yuav rais los mus ua tej yam uas koj yuav ua kam txhua hnuv. Tej yam uas koj xyaum ua no yuav ntxiv dag zog rau koj zaj lus tim khawv thiab pab koj kawm thiab ua zoo dua tas koj sim neej.”³

Lub hom phiaj Duty to God rau cov tub hluas hauv lub Pov Thawj Hwj Aloos peb tau ntxiv dag zog rau thiab kho kom tsom ntsoov tej yam tseem ceeb lawm. Lub hom phiaj yuav nyob hauv ib phau ntawv xwb

uas yuav duav tag nrho peb txoj hauj lwm hauv lub Pov Thawj Hwj Aloos. Cov Tub Hluas thiab lawv cov thawj coj yuav txais phau ntawv no. Yog ib rab cuab yeej uas muaj hwj chim ntau heev. Phau ntawv no yuav ntxiv dag zog rau cov tub hluas cov lus tim khawv thiab pab lawv nrog Vajtsww sib raug zoo. Phau no yuav pab lawv kawm thiab muaj lub siab xav ua tiav lawv tej hauj lwm hauv lub pov thawj hwj. Phau no yuav pab kom lawv nrog lawv ib tsoom niam txiv, khub hauv pawg pov thawj hwj, thiab thawj coj sib raug zoo.

Ob lub hom phiaj no pab kom cov tub hluas ntxhais hluas lav ris lawv tej hauj lwm yuav ua. Lawv yuav tsum kawm txog thiab ua tej yam uas yeej yuav nyuaj rau ib tug neeg twg. Thaum kuv xav txog lub sij hawm uas kuv tseem hluas, kuv yeej tsis nco qab qhov uas raug sim siab npaum li no. Auj, qee zaum muaj tej kev sim siab li no, tiam sis tsawg tsawg zaus xwb. Ob lub hom phiaj no hais kom cov hluas siv zog ua qees tej yam lawv yuav tsum ua thiab kawm tej yam no thiab rais los muaj dag zog ntawm sab ntsuj plig zuj zus tuaj rau ib lub sij hawm ntev li ob peb xyoos mus.

Thaum kuv ua tib zoo xav thaum ntawd, kuv pom tau tias tej yam uas muaj nyob hauv tej phau me nyuam ntawv no yog ib yam uas yus tuav tau uas piv tau rau tus Tswv txoj kev tso siab rau tiam hluas uas nyob niaj hnuv nim no thiab rau peb txhua tus uas hluv lawv. Thiab kuv tau pom hais tias tsim nyog tso siab rau lawv thiab.

Thaum kuv mus xyuas tej pawg ntseeg kuv tau pom tej pawg tub hluas uas tuav lub Pov Thawj Hwj Aloos. Kuv tau pom cov tub hluas uas ua tib zoo kawm tej vaj lug kub, npaj saib Vajtsww yuav xav kom lawv ua dab tsi, ces sau siab mus ua li ntawd, thiab tom qab ntawd ua tim khawv rau lwm tus neeg saib lawv tau hloov li cas rau ntawm sab ntsuj plig. Thiab thaum kuv ua tib zoo saib thiab mloog, kuv to taub zoo hais tias tej niam txiv, tej thawj coj, thiab tej neeg zeg zog puav leej hnov tau tus Ntsuj Plig tshoov lawv lub siab thaum cov tub hluas no qhia lawv saib lawv tau txais dag zog ntawm sab ntsuj plig li cas. Cov tub hluas no tau kev tshoov siab thaum lawv ua tim khawv rau cov mloog ib yam li cov thawj coj uas tau pab tshoov cov tub hluas lub siab.

Lub hom phiaj ntawm pawg Ntxhais Hluas muaj tib tug txheej txheem kom pab cov ntxhais hluas ncav kom tau lub hwj chim ntawm sab ntsuj plig thiab muab lub cib fim rau peb pab lawv. Qhov Personal Progress pab cov Ntxhais Hluas npaj txais tej kab ke ntawm lub tuam tsev. Lawv tau kev pab los ntawm lawv niam, niam tais thiab pog, thiab txhua tus poj niam hauv lub Koom Txoos tej yam ntxwv. Kuv tau pom qhov uas ib khub niam txiv tau pab nkawd ib tug ntxhais ncav tau nws lub hom phiaj thaum nkawd pom thiab qhuas txhua yam zoo uas nws ua.

Ob peb hnuv dhau los xwb, kuv tau pom ib leej niam ua ke nrog nws tus ntxhais txais lus qhuas vim nkawd ua ke ua ob tug yam ntxwv zoo heev.

Thaum nkawd qhia kuv saib tej lus qhuas no muaj nqi li cas rau nkawd, kuv hnov tau tias tus Tswv pom zoo thiab qhuas peb thiab.

Hais txog tej kev pab uas cov tub hluas ntxhais hluas no toob kas, ces qhov zoo tshaj yog ua rau lawv paub hais tias peb tso siab rau lawv hais tias lawv tab tom taug txoj kev rov qab mus tsev saum ntuj thiab hais tias lawv mus txog tau. Thiab peb pab li ntawd zoo tshaj plaws thaum peb nrog lawv mus thiab. Vim txoj kev yuav taug no ntxhab thiab com com kawb qee zaum, qee zaum lawv yuav poob siab thiab ntog. Tej zaum lawv yuav ntxhob siab me ntsis saib lawv xav mus qhov twg thiab yuav ua loj leeb mus ncav kom tau tej hom phiaj uas tsis tseem ceeb nyob mus ib txhis li. Ob lub hom phiaj uas kuv hais txog no yuav pab kom tsis muaj li no vim ob lub hom phiaj no caw tus hluas ua tej yam uas yuav coj los thiab txais tau tus Vaj Ntsuj Plig Dawb Huv ua lawv luag.

Cov lus ntuas zoo tshaj uas peb hais rau cov hluas yog qhov uas lawv yuav rov qab mus cuag Leej Txiv Saum Ntuj Ceeb Tsheej tsuas yog thaum Vajtswv tus Ntsuj Plig coj thiab kho lawv kev xwb. Yog li ntawd, yog tias peb txawj ntse, peb yuav yaum, qhuas, thiab ua yam ntxwv rau txhua tsav txhia yam uas caw tus Vaj Ntsuj Plig Dawb Huv los uas peb luag. Thaum lawv qhia peb hais tias lawv ua dab tsi thiab xav li cas ces peb yuav tsum tau tsim nyog txais tus Vaj Ntsuj Plig Dawb Huv ua peb luag thiab. Thaum ntawd, peb

cov lus qhuas yuav yog zoo ib yam li Vajtswv qhuas lawv thiab. Thiab yog tias peb yuav tsum qhuab qhia cov hluas, lawv yuav paub hais peb hlub lawv thiab lawv yuav paub tias Vajtswv hlub lawv, lawv yuav tsis xav tias peb xyeej lawv uas yuav ua tau rau Ntxwv Nyoog ntxias tau lawv.

Tus yam ntxwv zoo tshaj uas peb yuav tsum coj ua yog kom ua tej yam uas peb xav kom lawv ua. Peb yuav tsum thov Vajtswv kom tau tej txiaj ntsim ntawm tus Ntsuj Plig. Peb yuav tsum ua tib zoo xav txog cov vaj lug kub thiab cov yaj saub uas nyob niaj hnuv nim no cov lus. Peb yuav tsum npaj zoo ua tej yam uas tsis yog lam tau lam xav ua, tiam sis yog tej lus cog tseg. Thiab thaum ntawd peb yuav tsum ceev peb tej lus cog tseg ntawd rau Vajtswv. Thiab peb yuav tsum pab lwm tus neeg dhau ntawm qhov uas peb qhia lawv txog tej koob hmoov ntawm txoj Kev Theej Txhoj uas tau muaj los nyob hauv peb lub neej.

Thiab peb yuav tsum ua yam ntxwv rau cov tub hluas ntxhais hluas hais txog txoj kev coj ruaj nrees uas Tswv xav kom lawv coj raws li. Thaum peb ua li no, peb yuav pab lawv tso siab tau hais tias muaj ib hnuv twg lawv yuav hnov tau tus Cawm Seej thiab Leej Txiv Saum Ntuj Ceeb Tsheej hais cov lus nram qab no rau lawv hais tias: “Zoo heev, koj yog tus tub txib uas zoo thiab ncaj ncees! Tej yam me me uas koj saib, koj ua ncaj. Kuv yuav tsa koj ua tus saib yam uas loj. Koj cia li los nrog kuv nyob kaj siab lug!”⁴ Thiab peb cov uas pab lawv

yuav hnov tau cov lus ntawd thiab muaj kev zoo siab ib yam.

Kuv ua tim khawv hais tias tus Tswv hlub nej thiab Vajtswv cov me nyuam txhua tus. Nov yog nws lub nceeg vaj uas nws muab txum tim rov qab los dhau ntawm tus Yaj Saub Yauxej Xamiv. Thomas S. Monson yog tus Tswv tus yaj saub niaj hnuv nim no. Kuv cog lus hais tias nej txhua tus, thaum nej ua raws li tej kev tshoov siab los saum ntuj los hauv Yexus Khetos lub Koom Txoos muaj tseeb tiag no, hais tias peb cov tub hluas ntxhais hluas, thiab peb cov uas pab lawv thiab hlub lawv, yuav rov qab mus txog tsev saum ntuj nrog Leej Txiv Saum Ntuj thiab tus Cawm Seej nyob ua ke ua tej tsev neeg thiab muaj kev zoo siab nyob kaj siab lug mus ib txhiab ib txhis li. Los ntawm Yexus Khetos lub npe, amees.

LUS CIM

1. 3 Nifais 14:13–14.
2. Saib Thomas S. Monson, lub Tuam Rooj Sab Laj thaum lub Kaum Hli Ntuj, xyoo 2008.
3. Young Women Personal Progress phau ntawv, “Standing as a Witness of God,” p. 6.
4. Mathais 25:21.

© 2010 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub luam txhais lus As Kiv: 6/09. Pub luam txhais lus Hmoob: 6/09. Kev txhais *Visiting Teaching Message, May 2010*. Hmong. 09365 295